



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ  
Ո Ր Ո Շ ՈՒ Մ**

-- հոկտեմբերի 2021 թվականի №---Ա  
քաղ. երևան

**«ՏԵԼԵԿՈՄ ԱՐՄԵՆԻԱ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ ԿՈՂՄԻՑ «ԶԻԷՆՍԻ-ԱԼՖԱ» ՓԱԿ ԲԱԺՆԵՏԻՐԱԿԱՆ ԸՆԿԵՐՈՒԹՅԱՆ ՀԱՆՐԱՅԻՆ ԱՄՐԱԿՑՎԱԾ ՀԵՌԱԽՈՍԱՑԱՆՑԻ ԽՈՂՈՎԱԿՆԵՐԻ ԱՋԱՏ ԹՈՂՈՒՆԱԿՈՒԹՅԱՆ ՎԱՐՁԱԿԱԼՈՒԹՅԱՆ ՏՐԱՄԱԴՐՄԱՆ ԴԻՄՈՒՄԻ ՄԱՍՆԱԿԻ ՄԵՐԺՄԱՆ ՀԻՄՔԵՐՆ ԸՆԴՈՒՆԵԼՈՒ ՄԱՍԻՆ**

Հաշվի առնելով՝

ա) «Տելեկոմ Արմենիա» փակ բաժնետիրական ընկերության (այսուհետ՝ Ընկերություն) 2021 թվականի հոկտեմբերի 5-ի գրությունը, որով Ընկերությունը «ԶԻԷՆՍԻ-ԱԼՖԱ» փակ բաժնետիրական ընկերության կողմից հանրային ամրակցված հեռախոսացանցի խողովակների ազատ թողունակության վարձակալության տրամադրման դիմումի (Երևան քաղաքի Արտեմ Միկոյան 109/8 հասցեից մինչև Տիգրան Մեծի 4 հատված) վերաբերյալ հայտնել է, որ Դավթաշեն և Աջափնյակ համայնքներով անցնող, ինչպես նաև Պոռոշյան 1 հասցեից մինչև Տիգրան Մեծի 4 հատվածներում ազատ խողովակների քանակը սահմանափակ է, և Ընկերությունը նախատեսում է սեփական կարիքների համար դրանք օգտագործել առաջիկա 3 տարիների ընթացքում, այդ իսկ պատճառով վարձակալության հիմունքներով հանրային ամրակցված հեռախոսացանցի խողովակների ազատ թողունակություն նշված հատվածներում տրամադրելու հնարավորություն չունի: Միաժամանակ, Ընկերությունը հայտնել է, որ Արաբկիր համայնքի Կիկյան 1 հասցեից մինչև Պոռոշյան 1 հատվածում խողովակների քանակը և ազատ թողունակությունը բավարար է և կարող է տրամադրվել վարձակալության,

բ) Հայաստանի Հանրապետության հանրային ծառայությունները կարգավորող հանձնաժողովի (այսուհետ՝ Հանձնաժողով) 2021 թվականի հոկտեմբերի 6-ի գրությանն ի պատասխան Ընկերության 2021 թվականի հոկտեմբերի 11-ի գրությունը, որով վերջինս, Հանձնաժողովի 2008 թվականի նոյեմբերի 5-ի №593Ն որոշմամբ հաստատված՝ հանրային ամրակցված հեռախոսացանցի շահագործման մեջ գերիշխող դիրք զբաղեցնող

օպերատորների կողմից հանրային ամրակցված հեռախոսացանցի գծերի ենթակառուցվածքների գտնվելու վայրի և առկա թողունակության մասին տեղեկությունների տրամադրման կարգի պահանջներին համապատասխան, ներկայացրել է խնդրո առարկա հասցեներում գտնվող դիտահորերի համարների, դրանց անձնագրերի և ազատ խողովակաշարերի քանակների վերաբերյալ տեղեկատվություն: Միաժամանակ, Ընկերությունը հայտնել է, որ մինչև 10 խողովակներ ունեցող մագիստրալային խողովակաշարերը վերջինս պլանավորում է օգտագործել մոտակա 3 տարիների ընթացքում իր օպտիկամանրաթելային ցանցի ընդլայնման և նոր սերնդի ցանցի կառուցման նպատակով, իսկ այն հատվածներում, որտեղ առկա են 10 և ավելի ազատ խողովակներ, Ընկերությունը պատրաստ է տրամադրել վարձակալության: Բարձրացված հարցի այլընտրանքային լուծում կարող է հանդիսանալ նոր ստորգետնյա խողովակաշարի կառուցումը,

գ) Հանձնաժողովի 2021 թվականի հոկտեմբերի 13-ի գրությանն ի պատասխան Ընկերության 2021 թվականի հոկտեմբերի 19-ի գրությունը, որով վերջինս հայտնել է, որ ծառայությունների որակի բարելավման և հասանելիության ընդլայնման նպատակով Ընկերությունը մայրաքաղաքում և մարզերում սկսել է հաջորդ սերնդի FTTH (Fiber to the home) օպտիկամանրաթելային ցանցի կառուցումը: Ցանցի կառուցումը ավարտվել է Դավթաշեն համայնքում, իսկ Արաբկիր և Կենտրոն համայնքներում ընթանում են կառուցման աշխատանքներ, որոնց ավարտը նախատեսված է համապատասխանաբար 2022 թվականի ապրիլի 1-ին և 2022 թվականի ավարտին: Երևան քաղաքի մյուս վարչական շրջաններում ցանցի կառուցումը պլանավորվում է ավարտել մինչև 2023 թվականի ավարտը:

Միաժամանակ, Դավթաշեն և Արաբկիր համայնքներում նոր սերնդի ցանցի արդեն կառուցված, ինչպես նաև Կենտրոն համայնքում կատարված նախագծերում ներառված հատվածներում մայրուղային խողովակաշարերը, որոնցում խողովակների քանակը փոքր է 10-ից, ամբողջովին օգտագործվել են:

Ընկերությունը խնդրել է նաև հաշվի առնել, որ խնդրո առարկա ստորգետնյա ենթակառուցվածքը հիմնականում կառուցվել է անցյալ դարի 50-70-ական թվականներին և տարիների ընթացքում բնական մաշվածության և տարբեր շինարարական կազմակերպությունների կողմից բազմաթիվ հատվածներում հասցված վնասների արդյունքում դարձել է օգտագործման համար ոչ պիտանի և, հայցվող խողովակաշարի երկարությամբ և ժամկետի խիստ սղությամբ պայմանավորված՝ հնարավոր չի եղել

առաջյա հետազոտել ամբողջ հետազոտող, ինչի պատճառով տրամադրվելիք հատվածների անցանելիության վերաբերյալ հստակ պատկերացում չկա,

դ) Հանձնաժողովի 2011 թվականի սեպտեմբերի 7-ի N°414Ն որոշմամբ հաստատված՝ հանրային ամրակցված հեռախոսացանցի շահագործման մեջ գերիշխող դիրք զբաղեցնող օպերատորների կողմից այլ օպերատորներին հանրային ամրակցված հեռախոսացանցի խողովակների ազատ թողունակության վարձակալության տրամադրման կանոնների (այսուհետ՝ Կանոններ) 17-րդ կետի 2-րդ ենթակետը՝ գերիշխող օպերատորը իրավասու է մերժել օպերատորի դիմումը, եթե Հանձնաժողովին ապացուցի, որ խողովակների ազատ թողունակությունը կսպառվի դիմումն ստանալու օրվանից հետո 3 տարվա ընթացքում, իսկ Կանոնների 19-րդ կետի համաձայն՝ եթե դիմումը մերժելու հիմք է հանդիսանում Կանոնների 17-րդ կետի 2-րդ ենթակետով նախատեսված պայմանը, ապա գերիշխող օպերատորը պարտավոր է Հանձնաժողով ներկայացնել հիմքեր առ այն, որ օպերատորի կողմից ենթակառուցվածքի պահանջված հատվածում ազատ թողունակությունը սպառված է կամ կսպառվի իր կարիքների համար դիմումի ամսաթվից հետո 3 տարվա ընթացքում,

ե) որ ուսումնասիրելով Ընկերության կողմից ներկայացված դիմումը մերժելու պատճառ հանդիսացող հիմնավորումները (այդ թվում՝ կից ապացույցները), Հանձնաժողովի գնահատմամբ, առկա են Ընկերության կողմից «ՋԻԷՆՍԻ-ԱԼՖԱ» փակ բաժնետիրական ընկերության հանրային ամրակցված հեռախոսացանցի խողովակների ազատ թողունակության վարձակալության տրամադրման դիմումի մերժման բավարար հիմքեր դիմումով հայցվող խնդրո առարկա այն խողովակաշարերի մասով, որոնց կառուցման աշխատանքները Ընկերությունը նախատեսում է ավարտել տվյալ դիմումն ստանալուց հետո 3 տարվա ընթացքում: Միևնույն ժամանակ, հաշվի առնելով, որ «ՋԻԷՆՍԻ-ԱԼՖԱ» փակ բաժնետիրական ընկերության դիմումով հայցվող՝ Ընկերության այն խողովակաշարերը որտեղ առկա են 10 և ավելի ազատ խողովակներ, վերջինս պատրաստ է տրամադրել վարձակալության, մինչդեռ անհրաժեշտ է իրականացնել առաջյա ուսումնասիրություն, և

հիմք ընդունելով Հանձնաժողովի 2011 թվականի սեպտեմբերի 7-ի N°414Ն որոշումը՝ **Հանձնաժողովը որոշում է.**

1. Ընդունել Ընկերության կողմից «ՋԻԷՆՍԻ-ԱԼՖԱ» փակ բաժնետիրական ընկերության հանրային ամրակցված հեռախոսացանցի խողովակների ազատ թողունակության վարձակալության տրամադրման դիմումի մերժման բավարար հիմքերի առկայությունը և թույլատրել Ընկերությանը մերժել դիմումը՝ դիմումով

հայցվող այն խողովակաշարերի մասով, որոնց կառուցման աշխատանքները Ընկերությունը նախատեսում է ավարտել դիմումն ստանալու օրվանից հետո երեք տարվա ընթացքում:

2. Ընկերությանը՝ 10 և ավելի ազատ խողովակներ ունեցող խնդրո առարկա խողովակաշարը վարձակալությամբ տրամադրելու վերաբերյալ «ԶԻԷՆՍԻ-ԱԼՖԱ» փակ բաժնետիրական ընկերության կողմից համաձայնության ներկայացման դեպքում, այն ստանալու պահից՝
  - 1) 23 աշխատանքային օրվա ընթացքում իրականացնել տեխնիկական պայմանի տրամադրման համար անհրաժեշտ ուսումնասիրություններ՝ «ԶԻԷՆՍԻ-ԱԼՖԱ» փակ բաժնետիրական ընկերության ցանկության դեպքում ներգրավելով վերջինիս ներկայացուցիչներին.
  - 2) 30 աշխատանքային օրվա ընթացքում տրամադրել տեխնիկական պայմաններ, որոնց վերաբերյալ «ԶԻԷՆՍԻ-ԱԼՖԱ» փակ բաժնետիրական ընկերության համաձայնությունն ստանալուց հետո՝ 10 աշխատանքային օրվա ընթացքում, վերջինիս հետ կնքել խողովակների ազատ թողունակության վարձակալության պայմանագիր:
3. Ընդունելի գիտություն, որ՝
  - 1) սույն որոշումը հրապարակվելուց հետո երեսուն օրվա ընթացքում Հանձնաժողովին հասցեագրված միջնորդության հիման վրա կարող է վերանայվել.
  - 2) սույն որոշումն ուժի մեջ մտնելու պահից երկամսյա ժամկետում կարող է բողոքարկվել Հայաստանի Հանրապետության վարչական դատարանում:
4. Սույն որոշումն ուժի մեջ է մտնում Ընկերությանն օրենքով սահմանված կարգով իրազեկելու օրվան հաջորդող օրվանից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ  
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ  
ՀԱՆՁՆԱԺՈՂՈՎԻ ՆԱԽԱԳԱԿ՝**

**Գ. ԲԱՂՐԱՄՅԱՆ**